

MENJAUHI PERBUATAN KHURAFAT

1. Walaupun zaman semakin moden, namun masih terdapat dalam kalangan masyarakat umat Islam yang masih mempercayai amalan-amalan khurafat sehingga boleh merosakkan akidah. Kejahilan segelintir umat Islam pada hari ini terhadap ilmu agama menyebabkan mereka mudah dirasuk dengan amalan-amalan tersebut.
2. Banyak amalan khurafat yang masih diamalkan oleh masyarakat hari ini seperti amalan pemujaan tempat-tempat keramat di tempat sunyi atau di pergunungan. Tujuan pemujaan tertentu ini adalah kononnya untuk mengubati penyakit, menolak sial, memohon sesuatu hajat, amalan tarik duit, memohon mencari harta karun dan sebagainya. Mereka yang melakukan khurafat semakin bertambah sesat dan syaitan pula semakin sombong atas kejayaan menyesatkan anak-anak Adam.
3. Khurafat ialah semua cerita rekaan atau khayalan, ajaran-ajaran, pantang larang, adat istiadat, ramalan-ramalan, pemujaan sama ada berbentuk amalan atau kepercayaan yang bertentangan dengan akidah dan ajaran Islam yang membawa kepada syirik.
4. Khurafat juga boleh boleh berlaku kepada unsur-unsur mistik yang boleh merosakkan akidah dan mendorong kekufuran seperti percaya kepada tangkal, azimat, ilmu pengasih, ilmu hitam, membuang sial, mlariskan perniagaan dan seumpamanya. Selain itu, antara bentuk khurafat moden yang dipercayai segelintir masyarakat ialah kepercayaan kepada bintang, tarikh lahir, simbol atau angka tertentu yang didakwa boleh membawa tuah atau mendatangkan sial.
5. Oleh yang demikian, mana-mana orang Islam yang melakukan amalan, perbuatan atau kepercayaan khurafat atau sebarang amalan, perbuatan dan kepercayaan yang boleh disifatkan sebagai khurafat pada mana-mana tempat adalah melakukan suatu kesalahan yang bertentangan dengan Hukum Syarak, mereka wajib bertaubat dengan meninggalkannya dan memohon keampunan kepada Allah Taala.
6. Antara langkah-langkah untuk menjauhi amalan dan kepercayaan khurafat adalah seperti berikut :-
 - a) jauhi dan tinggalkan amalan-amalan yang tidak berdasarkan nas-nas syarak sama ada al-Quran dan Hadis.

- b) tidak mempercayai cerita-cerita rekaan, dongeng atau khayalan yang bersumberkan kepercayaan-kepercayaan karut dan tidak lagi meneruskan adat yang bercanggah dengan ajaran Islam.
 - c) tidak disandarkan hajat atau permohonan kepada bantuan makhluk halus atau seruan mendapat pertolongan daripada roh-roh yang telah berada di alam barzakh.
 - d) tidak melakukan pemujaan kepada kubur, telaga, busut, pokok, senjata lama, selendang dan sebagainya dengan kepercayaan objek-objek tersebut dapat membantu untuk mencapai sesuatu hajat.
7. Terdapat amalan yang dianjurkan untuk membantu manusia untuk mendapat ketenangan ketika gelisah berhadapan ujian sama ada berbentuk penyakit, kesusahan, kesulitan, musibah dan bala seperti :
- i. memperbanyak beristighfar memohon keampunan Allah SWT dan berdoa dengan yakin dan bersungguh.
 - ii. memperbanyak zikir munajat berserta solat sunat hajat dan solat sunat istikhara.
 - iii. Melipatgandakan ibadat dan amalan kebaikan untuk mengundang rahmat dan kasih sayang Allah.
 - iv. memperbanyak bersedekah terutama kepada fakir miskin dan anak-anak yatim kerana doa penerima sedekah itu amat hampir dengan Allah SWT.
8. Marilah sama-sama kita hayati firman Allah Taala di dalam surah at-Taubah ayat 51 :

﴿ قُلْ لَنْ يُصِيبَنَا إِلَّا مَا كَتَبَ اللَّهُ لَنَا هُوَ مَوْلَانَا وَعَلَى اللَّهِ فَلِيَتَوَكَّلِ الْمُؤْمِنُونَ ﴾ ﴿٥١﴾

Katakanlah (Wahai Muhammad) : “Tidak sekali-kali akan menimpa kami sesuatu pun melainkan apa yang ditetapkan Allah bagi kami. Dia lah Pelindung yang menyelamatkan kami dan (dengan kepercayaan itu), maka kepada Allah jualah hendaknya orang-orang yang beriman bertawakkal”

Disediakan oleh,

Bahagian Maktabah
Jabatan Mufti Negeri Perak
8 Zulqaedah 1443H / 8 Jun 2022